

摘藻堂四庫全書薈要

集部

欽定四庫全書薈要卷一萬四千二百六十九

具部

武溪集卷十四

宋 余靖 撰

表

乞外任狀

臣誤被採擢待罪諫垣自揣空疎無以上報去歲嘗與
蔡襄皆以親老願除家便一官庶就侍奉聖慈寬裕悉
蒙厚恩蔡襄給假還鄉臣某特賜縑帛仍令差人迎侍
歸京奉養仰荷非常之恩足為私門之幸事出望外捐

軀不忘今春得臣父書候秋與孫男迎娶乃能即路初
領此訊誠亦有待其來今聞蔡襄父母不忍去鄉國惟
襄獨行還朝伏緣蔡襄躬自奉迎尚猶不至微臣差人
般侍必更遷延在臣私心進退無措伏念臣備職諫諍
言多過差老父衰年遠在南土上不能補國家之闕下
不能展庭闈之私何顏自安久玷清望陛下憫此遠迹
諒其素心俾臣先盡事親之誠徐圖報國之効在於出
處不陷憲章伏乞特受臣沿流家便一郡差遣以便侍

養庶當孝理之朝未缺人臣之行若謂臣兼領史職不當差出則葉清臣楊察等差出已有成例但臣無任

再乞外任狀

右臣近有奏陳願授家便差遣雖堅誠請未蒙朝旨允從伏以國家之意謂臣身忝諫官日言國事今一旦無故即除外任恐四方傳聞以為不容諫諍不忍遣去蓋惜朝廷之名伏念臣生長遠方不識忌諱頃年得罪但坐多言再表乞歸乃得近鄉小郡曾未逾嶺母氏已亡

服終還臺即求外補願歸江國稍便家庭庶因斗筭之
祿用勤晨夕之養而國家權俾掌禮因得奉朝去春忽
被命書猥參諫列言不經務盡忠無益於時才非出人
論事不能無過尋瀝私懇仰干宸嚴但緣偏親向衰乞
以寸祿歸養遽蒙天睠特賚帑縑俾為奉迎之資不許
脫然而去實逾半載親輿未來尋已啟陳未奉俞允伏
惟聖神在宥俊乂如林才過臣者比肩疊跡臣去此職
必當得奇士開益聰明如或惜去朝之為重恐外遷之

差屈則乞令臣帶小省之官為名城之守上以昭陛下
從諫之盛德下以成微臣養親之私榮中外聞之自為
至美之事固於朝廷無所虧損但臣無任

免知制誥狀

右臣准閣門告報已降勅告授臣守依前官知制誥知
諫院者伏念臣遠官孤跡本乏才謀朝廷誤知擢在諫
署闕失之政無所建明柔佞在庭不能指擿前兼史職
已愧踰涯進典命書愈知非據况侍從之列當以才升

諫諍之臣不宜速進臣積歲未久無善可稱全身免責
固為優幸非次被寵豈免刺譏且累上表章乞便侍養
即蒙遷授難以請行臣之私心不期冒進未能揣分何
以宿官乞迺濫恩以抑奔競其所降勅誥乞賜指揮回
納中書謹具狀陳乞以聞伏候勅旨

免判銓狀

右臣奉勅差權同判吏部流內銓者竊以先朝初定諫
員不兼他職蓋使專於論議庶或補益聰明臣叨掌書

命已增憂愧若更兼領銓管則恐智慮不周力小事叢
必致顛隕其上件差遣伏乞停罷謹具狀奏聞伏候勅
旨

免知諫院狀

右臣昨蒙恩授臣依前官知制誥知諫院及准勅差兼
權同判吏部流內銓臣再有狀乞回納勅誥停罷差遣
各奉聖旨不得辭免今依准聖旨被受訖伏以朝廷建
置諫官俾其論議得失乃是分判忠邪升擢賢俊之路

臣在官歲餘讜言無取得免黜罷已是優恩今擢居侍從而復兼此職乏自知之分塞後來之途於臣之身則讒邪有窺伺之端於國之體則俊良有滯留之歎伏乞罷臣諫職以避賢路

免史館脩撰狀

右臣准閣門關報蒙恩授臣史館脩撰者伏緣脩史之任須得良直之才如臣空疎豈堪選擇兼臣去年以來為父年老在遠累狀陳乞外官以便侍養伏蒙聖慈賜

臣縑帛許令差人般迎歸京侍奉後來得書雖已在路切恐衰老之年不能久居京國將來却乞外任是臣虛受國恩所有修撰之職不敢克當伏乞特賜指揮閣門回納勅誥但臣無任

第二狀

右臣昨蒙恩授臣史館修撰尋以前後累狀陳乞外任以便侍養不敢虛受國恩乞賜罷免准今月十九日中書劄子奉聖旨不得辭讓伏緣君命再三不敢煩瀆已

稟朝旨祇授勅誥訖切以為臣之節惟君所任不避煩
難固其常理然而材器有限又須量力若貪榮慕進不
知其分一職有曠不稱所委豈獨身災兼傷國體臣今
兼職數處於臣之身實為榮幸量臣之力必不能堪除
諫官已有定員候正官到闕自當省罷外伏念吏部甄
別流品不可因循史官考尋事迹又宜用備獨當一局
猶恐不精兼領二司必致疎畧臣伏見田況歐陽修皆
筆力傑出才過臣者各釐外務不用所長伏乞指揮推

擇其一代臣此職臣不以內外甘就煩使其史館修撰
勅誥臣欲親自齎赴中書送納謹具狀陳乞以聞伏候
勅旨

吉州謝上表

臣某伏奉五月十五日勅命差知吉州軍州事放朝辭
取便路疾速發赴本任者天鑒素誠特從輕典星馳即
道已屆所臨尋於某月某日到州赴任訖中謝伏念臣
生自邊州闇於時務謬從科試早玷書林陛下擢臣於

遷謫之餘寘臣於諫諍之列匪由言薦特出宸衷而又
掌西掖之訓詞執史官之汗簡推寵過分非臣所堪自
惟疎賤之中孤直見進思所以報知無不言補朝政而
未工為身謀而已拙讒謗不恤用酬主知論議所伸寡
與勢合常欲引去以免衆猜豈意發於樞機自起瑕謫
然念間者夏臺效順再稟正朔虜帳怙強沮我封拜徇
虜約則西戎怨納夏款則北狄怒重師宿境須我報音
人人異論必有兵禍聖慮獨斷柄臣僉謀授以聘詞擇

於朝列有死不避見選於臣單車即途送者失色握節
以往敢望生還歷階而議所期理奪王命旣達而國體
獲伸胡兵自交而我盟兩就此乃廟堂成算非臣之功
及乎單于罷兵穹廬報聘謂知前議再伸理裝臣亦讓
以非才辭不獲命漢使薦至虜中甚歡迎勞尤勤宴犒
加等益重鄰好非私臣身臣旣頻到虜庭欲練胡事上
則接談於賓主下則訪事於輿隸示相親狎則務通其
情所臨機會則未嘗屈禮本謂六蕃之語可以博之豈

料一言之失不能免罪仰冀宸造鑒無他腸竊以臣素乏時名猥遭天睠出於孤官而延登近班豈無羣材而專聘絕域蒙此寵任人所忌嫉而不慎言語自罹憲章計其所犯死有餘責此蓋伏遇皇帝陛下至明御宇廣覆如天凡曰近臣非有大故不忍遐棄止除外官含容之德過於堯禹况夫廬陵古郡南近家庭臨民侍親不為失所戴荷恩育寧可貲度方今邊警雖息民力猶困賦斂加疾而吏以為健刻削已甚而上不能知若得詢

其疾苦思所施設蠲去橫取率循舊規朝廷聽而從之
豈以地狹為恨體國安民圖所報效臣之願也無任

乞分司狀

臣再瀝血誠上千天聽退量煩瀆甘俟誅夷伏念臣生
於鄙遠素無才識束髮從宦二紀于茲遭時見用遂忝
清近然念臣頃蒙擢在諫垣累上七章乞免諫職出就
外任以便侍養皆蒙朝廷不賜允許及至去年得罪不
敢迂路歸鄉又緣臣父年漸衰老不樂遠出尋曾乞移

便郡願解近職私誠雖切未聞報可臣揆才至薄負罪則深上無補於國家下闕奉於溫清一身之責萬死何逃臣今欲乞落職分司歸鄉侍養伏望天慈特賜矜允
謝分司表

臣某言與奪者朝廷之大柄出處者人臣之大方成命自天退身得地中謝伏念臣鄉邦遐遠世系孤平偶自童觀即親儒術尋師千里備歷險艱志學十年迺得科第國家頒制目以求士開文館以待賢臣之非才咸預

茲選每守孤直不事貴權蓋嘗忤旨而謫官尋亦知名
而見用降發中之詔擢居諫諍之聯以出疆之勤延登
侍從之列願宣忠力以酬萬乘之知屢被國恩自忘五
穀之賤多所論列罔畏仇嫌臣旣拙於周身毀者得以
銷骨惟期退避屢抗表章帝座雖處九重之深皇明遠
照萬里之外預頒明命克遂初心此蓋伏遇皇帝陛下
天覆無私乾剛獨斷念臣嘗經驅策不避艱危察臣本
以公言構成私隙俾從散秩歸奉所天下以成微臣就

養之勤上以全陛下退人之道丘山荷賜冰炭在懷

謝轉光祿少卿表

臣某言令月八日進奏院遞到勅誥蒙恩授臣光祿少卿依舊分司南京韶州居住者居深坎窞恩出天慈俯念戴盆之幽莫遂循牆之讓中謝伏念臣稟受愚暗生長遐荒爰自弱齡幸親儒術未脫飯牛之賤敢思縻爵之榮蓋遇國家海宇澄清仕途寬裕高則賢科射策採卿相之材次則卿品薦能分甲乙之選小吏計年而進

考商人校粟以論資戎旃奮起於卒徒勲門澤及於僮
隸廣為甄錄庸贊治平所謂得人而昌何云數路而已
由是例趨貢籍偶中文程逮于壯年再膺詔目遂陪邦
彥久服朝紳亦嘗預刊前史之闕文參修當世之大典
載筆而書言動抱藁而正禮儀補衮職而蹈無諱之譏
冒兵鋒而使不測之虜叙其微效擢在近班言思報國
之忠身罹負俗之謗簞中之辱昔賢亦有非辜日邊之
遥丹誠無以上訴退分冗秩還侍親庭鴈鷺久費於稻

梁禽魚幸返於林藪採蘭潔膳聊同孺子之歡種樹灌
園誠為拙者之效永言毀廢當絕照臨豈意思波下霑
窮轍此蓋伏遇皇帝陛下純仁廣覆至治旁羅一物未
泰而比之納隍羣賢雖積而勤於頓網順民心而敷治
因天瑞以建元溥念臣工衆罹罪罟重為緣坐輕或詆
誣凡曰瑕疵率加湔洗樂羊居外靡開盈篋之書陳平
有謀不問受金之過如臣遠迹素乏異才進本孤根退
因積毀所嗟聖世遂作錮人徒成畫餅之名莫展鉛刀

之用忽蒙零露之均澤忍使當春而獨枯苟非造化之恩寧及沉冥之地唯知死報無路捐軀但臣無任

讓南班第一狀

臣今月二十二日准韶州送到勅誥蒙恩授臣左神武大將軍雅州刺史者竊以國家棄瑕用人含垢御物毀廢之迹再賜甄收仰荷天恩罔知紀極伏念臣往年知吉州日以父年老樂在鄉土曾乞解官侍養適會朝廷恩命授臣分司外議雖若棄捐於臣實為私便官無曹

事月有俸錢內奉旨甘聊亦溫足近者就家增秩已出
非望今茲再宣成命復綴通班待遇至優豈宜辭讓臣
又聞之前典事親之禮八十者一子不從政九十者其
家不從政蓋謂高年之家親屬雖衆當留子男常在左
右也切緣臣父年近八十臣獨一弟翊已授惠州歸善
縣主簿違去膝下惟臣旦暮親侍膳羞今來旣授右職
便須遠赴邊任奉親而往則有道路之勞委親而行又
闕晨昏之養況今方隅無警賢俊至多不乏一臣以濟

衆務伏望聖慈察臣誠請許臣且守舊官依前分司韶
州居住所圖就養少裨孝治之風干瀆冕旒無任惶懼
待罪之至所有遞到勅誥已牒送韶州聽候朝廷回降
指揮繳納

第二狀

臣昨蒙恩除授左神武軍大將軍雅州刺史充壽州兵
馬鈐轄尋以父年老具狀奏聞乞守舊官依前分司侍
養今月十一日准中書劄子奉聖旨不許辭讓者伏念

臣昨以毀廢南歸因得侍親之便終身農畝實所甘心
忽蒙異恩再加錄用荷國家含養之德同天地更生之
仁仍蒙聖慈不許辭讓豈不知出身事主之節受命忘
家之忠圖後效可以滌前非履榮途勝於處窮巷況君
親之恩至厚而忠義之心弗忘但緣父年衰老先患上
氣每風露所觸則喘嗽尤甚迎侍艱難有此不便須至
再披肝膽干冒朝廷乞依前來所奏只守舊官依前分
司侍養伏望聖恩特賜俞允違拒詔命甘俟除削

謝轉衛尉卿表

臣某言十一月二十八日准進奏院遞到勅誥各一道
蒙恩授臣衛尉卿依前分司南京韶州居住散官勲封
賜如故者舉稀闊之典方治於隆平廣滲漉之仁遽霑
於枯瘁中謝竊以古之哲后皆建合宮體房心布政之
名行祖宗侑食之禮周同廟制蓋嚴配之所先漢比郊
儀故精禋之為重汶上之圖太簡國南之議未工允俟
聖朝裁定彛矩伏惟皇帝陛下順稽古訓祇答靈心即

路寢之正居講總章之大摯百神胥悅歆至治之馨香
萬國懽呼荷湛恩之汪濊如臣者孤危得罪擯廢累年
豈期蓬華之遐均蒙雷雨之施睚眦之辭未塞何意叨
榮支離之粟愈多敢忘圖報惟懷淵谷之懼更增斗極
之瞻但臣無任

虔州謝上表

臣某言九月六日進奏院遞到勅牒一道蒙恩落分司
南京守本官就差知虔州軍州事已於今月十日到任

上訖仰望雲天起於久廢重霑雨露恩比再生中謝伏
念臣出自寒微素無才識幸逢明主擢在近班本期名
教之敦崇冀正朝廷之黜陟不悟怨仇交構毀訾百端
尚蒙洪覆之仁移隸別都之籍退居田里坐變炎涼前
歲被以言綸授之勇爵宣君命而見召在臣義之必行
蓋以弟任遠官父方卧病委之遐適心所難安尋瀝血
誠再干天聽果回睿旨許遂家居免朝雖遠於宸廷奪
祿不從於吏議享無名之厚奉久愧冗閒乘一障以先

登亦惟驅策豈謂不離卿寺就委郡章旣同死灰之復
然俾展鉛刀之一割親有旨甘之便民當攘劫之餘得
奉寬條庶成後效此蓋伏遇皇帝陛下堯天廣覆湯網
宏開遺棄咸收幽隱必察皇明下燭同日月之無私惠
澤所霑匝乾坤而共泰永言朽瘁育以陽春特推簪履
之舊恩無使田園之虛老敢不佩服光寵罄竭疲駑詢
疾苦之所先遵簡易之成理不忘官守上報主知但臣
無任

桂州謝上表

臣某言昨於六月二十日准樞密院遞到勅誥蒙恩免
持服特授守祕書監就差知潭州兼本路安撫使并准
中書劄子奉旨令臣次日起離乘遞馬赴發本任仍令
韶州催促進發不得收接辭免文狀及在路再奉勅改
差知桂州充廣南西路都鈐轄兼經畧安撫使准中書
劄子三道催促赴任臣尋於今月十六日到任上訖事
起金草辭避無從君父之恩感深以泣中謝伏念臣生

在遐徼才識無取自遭荼毒未盈歲月近者儂蠻作梗
嶺外騷然憫彼遠方如在重病思與診療無有方術忽
奉恩旨令守長沙非喜名爵之所加自謂救兵之可出
且古之列國尚發恤鄰之師況今為王臣豈有坐觀之
理由是徧檄境內分起卒徒本約一月之中回至番禺
城下朝命既改人心不同論議紛紜師已減半既違本
志進退不遑職多任重而可憂就近辭遠而非便勉趨
新任自顧茫然官兵盡集於東南狂寇豈忘於巢穴當

資銳旅遏彼歸途而封疆闊遠守禦虛寡未知何計可
以逃責內惟愚暗何堪差委此蓋伏遇皇帝陛下敦二
儀之仁回萬里之照特憐孤露誤記寸長擢自苦塊之
中參於方面之寄敢不捐軀竭慮酬報皇恩伏乞赫震
天威剪滅醜類所以快四方之望懾百蠻之心臣之願
也候臣與楊畋處置廣西邊機了日却乞縑麻私室以
終喪制

乞解職行服狀

右臣去年六月二十日樞密院遞勅詰至韶州蒙恩免

持服特授祕書監就差知潭州兼本路安撫使仍准中

書劄子奉聖旨限次日起發不許辭免未到任間再奉

勅改差知桂州充廣南西路都鈐轄兼經略安撫使於

七月十六日到任又准中書劄子奉聖旨同楊旼等經

制廣南東西路盜賊事自授命已來蔣偕等諸將敗劔

臣亦累狀乞從追削歸守喪至今年正月十八日宣徽

使狄青部領三將兵甲殺敗蠻寇收復邕州賊首智高

奔回巢穴狄某孫某石某等各已發還京臣今分屯兵馬即回本任伏念臣去歲授官不敢辭免者賊在方面逼近鄉里欲因驅策翦除兇醜而絕無勞效幸免追逐况今盜賊出境賢俊滿朝何假墨縑以臨民政再念臣父存之日尚容歸侍父沒之後不能終喪乃是微臣事親之不誠朝廷置臣於有過臣若拂衣而先去則似要君抗章自陳蓋非虛飾伏乞朝廷憫臣持父之服有限報國之日尚長許臣解官歸鄉終滿喪制則臣感天荷

聖之誠無有紀極

第二狀

右臣輒傾血誠頻瀆天聽退量輕易甘俟誅夷臣聞三年之喪雖貴遂服國朝敦尚孝理為萬世法大臣遭父母喪者竝許解官終制去歲以蠻賊乘虛攻圍廣城於臣廬居最為密邇朝廷令臣墨綵起臨戎事臣亦以為朋友之急尚或赴之而況方面艱難豈當辭免由是自潭之桂東還于廣又西至于邕賓之郊驅馳忘倦雖以

恩臨諸洞信結交趾旁絕賊援而專輒之過已多其如
將怯兵情挫衄之罪相繼今茲宣撫使狄青領兵殺獲
寇黨收復邊城賊之殘徒遠遁外界兼安化蠻人已就
招安邊境寧息臣已回歸本任伏念臣所天隕逝方過
暮祥終身之戚冒哀為愧昨在邕州已曾陳乞歸鄉持
服終制今來除溪洞等處敘述勞効但于兵甲公事不
敢滯依舊行遣外所有貴州文字臣更不簽書欲乞候
錄敘效了當日不候替人將經畧安撫司公事交與轉

運使一面管勾臣却回鄉里持服終滿喪制如此則朝廷任用臣下存乎大體臣之進退亦得其分伏乞聖慈特賜俞允況今熙隆之運英賢滿朝未至無人堪付一郡不可使傷禮敗俗由臣而始臣無任

武溪集卷十四

欽定四庫全書薈要卷一萬四千二百七十

集部

武溪集卷十五

宋 余靖 撰

表

免轉給事中狀

右臣今月二十日進奏院遞到勅誥各一道授臣給事中者竊以賞為國典必中事功寵溢情涯敢忘辭避伏念臣揆材至薄賦命多奇幸遇休明免居羈賤向以邊臣失備蠻寇內侵越從縲絰之中起親金革之事漫懷

嫉惡素匪知兵所至面牆幾同學製賊鋒尚銳勝算無
施身負重而日增民在溺而同窘果煩睿眷特輟樞臣
狄青以人傑之雄總其師律孫沔以國器之重濟以事
機號令脩明士馬奮勵故得兇醜敗亡而絕迹蒸黔蘇
復以息肩青所以定二廣之阡危沔所以正一方之經
制臣則幸於免戾何止備員今乃例被綸言同增官秩
雖念勞勸善國家寧厚於恩章而揣分量能私計實非
於已力伏乞察臣誠請追改命書則朝廷無濫賞之譏

微臣免貪功之過干冒冕旒臣無任待罪激切之至所
有降到勅誥已送桂州軍資庫收管聽候朝廷指揮繳
納

免轉工部侍郎狀

右臣今月十三日三班差使殿侍韓某乘遞馬賞送到
中書劄子并勅誥各一道蒙恩授臣尚書工部侍郎仍
就賜銀二百兩者前恩未謝後寵復加內揆空疎第深
覲愧伏念臣出於寒族起自諸生素乏軼羣之材久罹

負俗之謗昨以蠻酋叛渙嶺服震驚雖分守土之權莫展擒兇之策屬元戎之善勝加邇臣之協謨因此安邊幸於免戾豈謂皇明遠照寵數荐臨且方上讓章蓋慙非據而未承報旨更冒今榮揣已力而實微干物議而為甚用傾愚懇上瀆天聰願回過恩庶全薄祜俾雷雨之澤無至妄施則草茅之姿免於深譴除就賜銀已受領外所有齎送到勅誥不敢祇受乞行回納已牒桂州軍資庫收管聽候朝廷指揮伏望聖慈特賜俞允但臣

無任

謝轉給事中表

臣某言昨於五月內進奏院遞到勅誥蒙恩授臣給事中依前知桂州充廣南西路都鈐轄經畧安撫使尋具狀辭讓准六月四日中書劄子勘會余某已降勅命除授工部侍郎奉聖旨余某所除恩命即令祇受更不得陳讓者中謝伏念臣才非應務識不逮人徒邁光華得諧祿仕向以邊臣失備蠻孽侵疆眷言苦塊之居適在

干戈之地遽蒙朝命俾預兵謀道路之勤敢忘夙夜軍
旅之任素昧韜鈴雖居戎馬之間蔑著涓塵之效幸賴
聖宸成算樞輔專征因節制之有歸勵偏裨而同力兵
鋒一集謀主先擒羣兇散亡庶民休息攻之必取蓋有
元勲職在具僚過蒙厚賞內懷非據嘗敘至誠乞回濫
恩庶全素志豈謂皇明下照寵渥荐加委之輯寧靡容
辭避此蓋皇帝陛下如天廣覆與物無私譬春夏之和
邇遐咸被比雷雨之施甘苦皆霑念孤臣之無庸與元

戎而並命仍加敦諭彌用憂兢敢不祇率政條舉寬民
察庶於境域同此樂康所有除工部侍郎勅誥已別狀
聞奏伏望聖慈許令辭讓但臣無任

謝轉工部侍郎表

臣某言昨蒙恩旨差三班差使殿侍韓某賫送到勅誥
一道授臣工部侍郎尋具狀聞奏乞行回納准七月五
日中書省劄子奉聖旨所降恩命即令祇受更不許辭
讓者中謝伏念臣生自寒鄉早逢明主知名驟進嘗叨

四戶之官負謗閒居猶紆三品之綬嚮還喪次甫畢喪期屬嶺表之驚騷預軍興之驅策徒竭前茅之慮蔑聞橫草之功所賴者廟堂講受於聖謨斧鉞肅將於王怒獻戎之捷蓋主將之勲有成從驃得侯於國家之恩大厚內愧冒塵於職任再乞追還於詔書誠出誤知不容退讓此蓋皇帝陛下恢乾坤之廣度垂日月之至明賞善勸能義存寧僭記功忘過意切兼容致此非材屢增顯秩敢不恪遵寬詔欽率彝章臥鼓滅烽上繫於聖化

思艱圖易庶保於民和臣無任

謝加勲封表

臣某言十二月二十六日進奏院遞到勅誥各一道蒙
恩授臣依前守尚書工部侍郎加輕車都尉進封始興
郡開國侯食邑五百戶仍放朝謝者祀典之修允合不
貺恩章之廣覃及具臣中謝恭以國家祚纂堯基化恢
禹服配天昭孝侑三聖以成儀灑澤均禧浹四方而渙
號伏念臣素微材術叨預藩宣方趨乘障之勤莫廁侍

祠之列豈期雷雨之施不遺菅蒯之微盟府何功遽勲
官之見錫爵名加等仍鄉郡以兼榮揣分逾涯省躬增
惕敢不外寧邊隙內撫民封惟堅犬馬之誠上答乾坤
之造臣無任

免充集賢學士表

臣某言今月二十一日進奏院遞到勅誥各一道蒙恩
授臣依前守尚書工部侍郎充集賢院學士依舊知桂
州并准樞密劄子中書樞密院同奉聖旨令臣分析兒

孫或近親骨肉一名聞奏者松楸之戀誠本告歸雨露之恩事出非望撫躬懷惕聞命若驚中謝伏念臣素乏藝文固無材武幸逢聖旦早列仕途間者起自廢居奄遭荼苦喪期未艾蠻事遽興首預詔除敢忘宣力賴元戎之制勝致闔境以再安臣以菲材例增優秩亦嘗乞收印綬還襲縗麻狡寇尚存私誠莫遂近以遠擒賊媼稍息邊虞願返鄉閭修營壠墓而遽蒙恩旨加賜職名未伸上報之誠已掇要君之過再念臣前歲與起居舍

人楊畋閣門副使曹修同時受命經制賊盜畋等各懷忠
蓋並練權謀當單車制禦之初值劇賊猖狂之際雖英
韶處置偶失事機而連賀保全皆由指授今畋等舊官
未復而臣屢承寵命揆茲進退之理彌深兢愧之懷乞
回過恩庶伸微志臣今乞將所授集賢院學士及兒孫
恩澤並各回納只乞特與楊畋曹修牽復舊官所貴上
有念勞之恩臣無過分之責其有遞到勅誥已牒送桂
州軍資庫收管聽候朝旨繳納伏乞聖慈特賜俞允

謝充集賢學士表

臣某言三月二十一日准進奏院遞到勅牒官誥各一道蒙恩授臣依前守尚書工部侍郎充集賢院學士依舊知桂州并准八月十一日中書劄子奉聖旨不許辭讓者封章上扣期遂於私誠宸旨下臨靡容於遜避中謝伏念臣命多奇隻器本疎頑起草掖垣嘗因毀去懷章郡邸遽以喪歸向緣蠶落之內侵遂假獸符而外禦昔賢之赴公難有警則腰經以從權人子之報私恩已

事則衣縷而返次敢再援於古義願追服於素冠遽沐
天慈過矜樗散仍卽藩垣之寄俾叅英俊之遊重念元
帥成功附驥已叨於撫仕常僚失職拔茅未復於舊聯
乞還過量之恩少遂推賢之志豈悟聖謨廣大國典寬
明俯鑒無他之賜不加非言之罪特申前命俾踐華途
此蓋伏遇皇帝陛下堯舜聰明乾坤覆燾春生秋殺不
私雨露之濡尺短寸長必盡輪轅之用致茲蒙鄙屢玷
寵光敢不祇率郡條樂宣吏職農桑舊俗咸俾於懷生

荒獷外區悉期於稟朔冀稍裨於化體庶上荅於皇慈
臣無任

免戶部侍郎狀

臣今月十四日進奏院遞到勅誥各一道蒙恩特授臣
戶部侍郎依前充集賢院學士候今任成資日仍令再
任者聞命驚惶伏增隕越伏念臣才非應務智不逮人
徒以虛名嘗叨近著須遭讒構甘在棄捐屬蠻事猝興
起臣於喪次而兵勢未集謀慮弗周力小任重日增憂

惕及至歸仁之勝三軍凱旋破賊者乃臣青之勲勞撫
民者皆臣沔之經制臣稟受節度謀無已出逮乎遠縛
賊母擒誅寇黨內則朝廷威令外則夷獠協同於臣愚
拙何功之有昨聞轉運提刑司舉再任臣尋以心力衰
耗不堪再任已具狀乞依舊分司於韶州居住庶得修
營墳墓今來忽頒成命就陟左曹恩渥至優實為過分
清秩厚俸誰不欲之事既逾涯豈宜安處伏緣本路外
接西廣六蕃南連交趾九道沿邊溪峒一百餘州苟失

撫綏立生患難非臣衰朽負謗之人能堪久任所有降
到勅誥不敢祇受已牒送桂州軍資庫收管聽候朝廷
指揮伏乞檢臣前奏許令換一散秩依舊分司於韶州
居住所有邊任伏望別擇材賢干瀆冕旒臣無任

謝轉戶部侍郎表

臣某言准都進奏院遞到勅誥各一道蒙恩授臣尚書
戶部侍郎依前充集賢院學士知桂州候今任成資日
仍令再任并准樞密院劄子奉聖旨依前降指揮不許

辭讓者邊亭擇帥願避於才能天綽宣恩靡容於遜讓
中謝伏念臣素亡學術濫竊時名屬蠻酋之擾邊即喪
廬而受命雖懷急病之意而無弭難之才名分一面之
權實稟元戎之算歸仁之捷臣力何施特磨之擒衆謀
允濟以致羣兇遠遁九譯難通天假手於外夷鬼得誅
於大懟皆皇威之震疊致醜類以殲夷幸免瘵官已慙
尸祿豈謂曲成天獎就錫詔函增秩而留用漢朝之故
事撫封以舊仍越嶺之攸居無易教條俾安氓俗重念

臣早緣積毀嘗隸別都久遺鵷鷺之行頗樂田園之趣
因茲過寵當思避賢惟冀罷歸庶全冲退而乃再頒綸
旨俾踐恩章願反汗以尤難但撫躬而增惕此蓋伏遇
皇帝陛下天慈廣覆乾體旁羅士濟濟而必臻術九九
而無棄致是草茅之質荐承雨露之恩謹當祇率政經
增修戎畧荒忽之外俾銷旅拒之謀瘡痍之餘期識中
和之治臣無任

潭州謝上表

臣某言伏奉勅命就差知潭州軍州事充荆湖南路安撫使已於今月二十三日到任上訖久居炎徼忽荷天恩雖尚遠於闕庭幸無虞於瘴癘中謝伏念臣素無學術徒遇休明宦路風波艱危備歷君恩雨露涓滴未酬頃罹藥棘之哀尚淺暮祥之制屬溪蠻之叛渙軼邊戍以跳梁攻圍越臺侵逼庾嶠雖微臣脩完堡障本期自固於家林而朝廷奪去縑麻遽俾分持於戎律懼薄材而敗事會元帥之成功假號渠魁旣遠逃於夷域主謀

兇媼俄就戮於天街蓋震疊於皇威致救寧於蠻落臣
無纖芥之力徒居戎旅之間職是累年空尸厚祿豈謂
忽承丹詔還撫舊封再見昔時之山川如全此生之首
領此蓋伏遇皇帝陛下天慈廣覆日照無私公聽並觀
用臣於衆毀必察之際記功忘過知臣有臨危不避之
誠每遇急難必蒙驅策旣臻平定未忍棄捐重施造化
之恩復委藩防之寄謹當率循政體講守邦經封內之
民或未康必詢其庶隱境上之兵猶未戢亟議於綏懷

圖報國恩庶逭官責臣無任

青州謝上表

臣某言蒙恩就差知青州充京東東路安撫使放朝辭疾速發赴本任已於今月二十五日到任上訖荆湘南部未著善聲海岱名區再叨方任揆能至薄拜命若驚中謝伏念臣出於寒微素無才業因緣盛旦忝竊通班向自喪廬起從邊寄名叨未將慙應變以非長算稟元戎幸因人而成事留撫凋瘵頗繇歲時無復望於寵榮

止願畢於婚嫁吳芮書忠之地尋獲便安營丘賜履之
封驟更委寄冒進誠知於尸祿懇辭恐涉於要君恪奉
宸恩聿臨所部況乎禹平九土青有古名周建諸侯齊
為大國俗幾一變之道士有四豪之風誠儒學之興居
亦寇盜之時起宜求當世之碩彥以舉列城之政綱豈
意樗櫟之散材亦叨兵馬之大郡此蓋伏遇皇帝陛下
廣乾坤之覆載恢堯舜之聰明不責纖芥之勞徒軫遺
簪之舊矜其晚節屢徙要藩謹當祇率國章詳求民瘼

不矯激以沽譽無慘刻以失中慕君子樂易之宜宣朝廷寬大之意勉圖所報庶或有成臣無任

謝加護軍食邑表

臣某言今月九日准都進奏院遞到勅牒官誥一道授臣依前守尚書戶部侍郎充集賢院學士加護軍食邑五百戶散官封食實封賜如故仍放朝謝者戴事閔宮講行闊典均禧函夏敷及具僚中謝恭惟皇帝陛下總攬蘿圖統承熙運謹蹈蒸蒸之孝寅守丕丕之基豐潔

染盛內盡享親之志序陳昭穆躬修合祭之儀旣成瓘
鬯之盛容廣布蓼蕭之渥澤下周朝黻普錫言綸臣素
乏時材濫叨藩寄駿奔述職阻捧於籩豆渙汗推恩並
陞於勲爵居慙德詔行畏食浮自天之命難違踏地之
憂愈積誓堅死節上答鴻慈但臣無任

免轉吏部侍郎狀

今月十七日准進奏院遞到勅誥二道授臣吏部侍郎
依前充集賢院學士散官差遣勲封食實封賜如故者

竊以國家列布衆職用待羣材至如文昌之居應三垣之上象天官之重貳六府之首卿當於國器以揀求豈宜年勞而敘進伏念臣智謀甚短名德素輕久冒朝恩屢膺州任嘗思引退式冀保全儻綸綍之濫加必負乘而益過願回誤寵庶遂初心所有降到勅誥欲乞繳納中書已牒送青州收管訖

免轉尚書左丞知廣州狀

并答詔

右臣准閣門告報蒙恩授臣尚書左丞依前集賢院學

士知廣州充廣南東路都鈐轄經畧安撫使替魏琰者
伏念臣昨於慶厯中自知制誥分司南京於韶州居住
是時蠻賊唐和走在嶺表已有臣僚言臣得罪不合令
居嶺南尚賴聖朝含容免臣遷徙至皇祐中蠻賊儂智
高俶擾二廣臣於父憂中首被詔命起知潭州移知桂
州充廣南西路經畧安撫使即與交趾公牒往來尋在
狄青陣中戰敗蠻賊收復邕州俄又捉獲儂智高母累
蒙聖恩遷官屢曾陳乞依舊分司不蒙俞允去歲甲峒

作過准中書劄子自青州召臣差充廣南西路體量安撫使面奉聖旨許令牒報交趾差官前來商量及至差費嘉祐等到欽州猶差人前來體探是與不是臣親身仍言臣與先王有分今來差臣知廣州緣廣州與交趾海道相通切慮談者易生構間若言臣交通外夷則於臣家族不便兼廣州大市居民元無城池圍捍近歲議者多欲修築羅城若從羣議必須大興力役以民力凋弊之後加臣才術短淺當此重寄必致曠敗臣今欲乞

只守舊官差知荆南潭州一次庶免愆謗干冒冕旒無任待罪惶恐之至伏望聖慈特賜俞允

答詔

勅余靖省所奏准閣門告報蒙恩授臣尚書左丞依前集賢院學士知廣州充廣南東路都鈐轄經略安撫使臣才術短淺當此重寄必致曠敗欲乞只守舊官差知荆南潭州一次事具悉聞者邊吏無狀視盜不謹致茲蠻蜚擾我嶺嶠番禺之地嘗罹寇患凋弊迄今傷夷未

復牧守之任推擇惟難以卿策慮無遺忠義有素文理
足以綏衆武備足以折衝進居丞轄之重付畀方面之
寄必能宣明威信朕庶幾無南顧之憂矣而卿何嫌何
疑復多讓焉是彰朕之不明而無以知賢也當體至意
往服厥官所乞宜不允故茲詔示想宜知悉

再免知廣州表

臣某言准今月十七日詔書以臣蒙恩授尚書左丞依
前集賢院學士知廣州臣才術短淺當此重寄必致曠

敗欲乞只守舊官差知荆南潭州一次所乞宜不允者
外朝疎遠固有於官儀中詔丁寧遽頒於天語推聖恩
之過厚在臣分以何安內愧空疎理當辭避中謝伏念
臣才非應務智乏周身謗缺易成風波可畏頃者荐修
鄰好三使虜庭始由歡聘以通情終於習熟而為罪一
時儂蠻干紀幕府專征蕩寇黨則元帥之謀擒魁媼則
羣夷之力曾無涓効屢玷勲書去歲峒蠻憑陵官軍沮
折詔臣喻指事止綏邊况是單車之戒行已蒙敘進豈

可彤墀之復命再添陞資切緣嶺海之遙藩垣之重若
方隅之有警則退讓以無名當今時在弭兵理非避事
就近而不就遠雖曰便安辭易而不辭難敢期煩瀆且
又越臺之境胡賈雜居古者城無外墻當由土之疎惡
謀於修築殆及旬年計其徒庸難乎速就惜民力則謂
之弛備徇衆議則困於勞人玩寇之謗若興覆族之誅
可懼矧以地聯鄉曲勢有嫌疑儻回渙汗之恩實荷保
全之賜臣情願不就轉官恩澤乞只守舊官差知荆潭

一郡謹奉表陳乞以聞伏望聖慈特賜俞允干冒旒袞
但臣無任

廣州謝上表

臣某言奉勅差知廣州軍州事兼管內勸農市舶使提
點銀銅場公事充廣南東路都鈐轄兼本路經畧安撫
使已於今月十八日到任上訖斗筭器小方面任隆海
國雖遐聖恩尤厚中謝伏念臣稟生卑薄賦性顓愚誤
蒙當宁之知殊乏防閑之慮三聘未羈之虜終以左遷

一彈不孝之人遭其返噬既不虞而致毀固無望於復

燃就喪次以家居屬儂蠻之寇境愚謂古之卿士退處鄉閭或遇凶荒之期賊盜為梗則必同堅壁用庇族姻謀與守臣共伸此議朝廷因其急病誤謂知兵起於縑絰之中委其金革之事以至絕交夷唇齒之援擒寇魅子母之親正軍刑於藁街愴國威於銅柱在見聞之或異亦讒謗之互興上賴天慈屢更藩寄去歲邕邊失策納彼逋逃峒獠恃強遂成侵擾邏司喪元而潰敗列

郡聞風而震驚因驛騎以召臣俾單車而諭指雖島夷
聽命願誅首惡之人而塞將貪功未絕交爭之患亦旣
與之約束各守封疆苟邦令之必行諒吾圉之能固猶
以嶺服之外越徼相通俾臨此州以辦邊事竊惟兵火
之後瘡痍未平力役尚繁生業猶困將祈存恤當擇循
良再具表陳莫回恩旨此蓋伏遇皇帝陛下乾剛下濟
離照旁羅儻寸有所長則使之必報輪翮無遺於木鴈
潢汙或薦於王公致此非才亦叨重任敢不率勵愚慮

勉守孤忠察蕃漢險易之情宣陛下憂勤之意庶乎萌
隸同被休明臣無任

謝加勲邑表

臣某言今月二十七日進奏院遞到勅牒官誥各一道
伏蒙聖恩授臣依前守尚書左丞充集賢院學士加上
護軍進封開國公食邑五百戶散官實封賜如故者合
宮禮成綿區澤普不遺遐遠咸被冲澍中謝恭惟皇帝
陛下昭事上穹丕承洪緒徧舉累朝之闕典再修宗祀

之盛儀即露寢以達誠御端闡而渙號旁周覆載罔不
懽呼下逮搢紳咸加命數臣器能無取禮秩兼優護諸
將以書勲冠五等而疏爵仍增稍食備極寵靈敢不荷
生育之恩勤簡惠之政誓全苦節上答宸慈但臣阻守
外藩不獲奔詣闕庭臣無任


謝轉工部尚書表

臣某言今月十九日進奏院遞到勅誥各一道伏蒙聖
恩授臣工部尚書依前充集賢院學士加柱國食邑五

百戶散官實封賜如故者龍德飛天蘿圖興運曠蕩之
澤遐遠不遺中謝伏念臣學謝兼明器慙遠到夤緣孤
進遭遇先朝亟登詞翰之科頻居文史之任遽繇諫路
擢掌王言常欲北屈強遼南羈勁越未能勝任每預遣
行曾無橫草之功連被拔茅之寵屢委臨於戎律久陪
貳於文昌此蓋伏遇皇帝陛下嗣守丕基渙發大號乾
坤之造海嶽至大而必包雷雨之恩動植無微而不及
致茲散拙亦預甄陞素乏羽儀之才遽當喉舌之任將

何以根本萬事出納五言謹當祇畏簡書恪脩條教更
勵委珠之節不忘曳履之忠庶答天慈以逃官謗但臣
守遠藩鎮不獲奔詣闕庭臣無任

武溪集卷十五



總校官庶吉士 臣 張能照

校對官檢討 臣 裴 謙

謄錄監生 臣 劉銓瑛

欽定四庫全書薈要

集部

武溪集卷十八

六至

詳校官助教臣常循



欽定四庫全書薈要卷一萬四千二百七十一


集部

武溪集卷十六

宋 余靖 撰

表

謝續支請受表


臣某言今月十六日准中書劄子奉聖旨依前守光祿少卿分司南京許於韶州居住令三司接續支與請受者有命自天再霑於幽隱無功受祿但益於戰兢中謝伏念臣素乏器能生在遐陬幸逢聖代登歷仕階夫何

閭閻淺之材常居文雅之選屢蒙驅策罔避險夷頃因專對之勤擢在邇臣之列深虞福過尋已謗生仇人之訴得行逐客之書難上退歸田里坐易歲時甘海嶠以陸沉沐天慈之再造起于謫籍付以伍符上荷君恩固無宜於堅讓適當父病難捨之而遠行重瀝血誠果從私便吏議俾停於月廩家居尤畏於簡書本冀承顏之歡幾成餬口之患遽蒙宸眷荐錫綸言雖容彭澤之歸仍續鄭均之祿此蓋伏遇皇帝陛下堯心廣愛乾體無私

明比日升極大荒而普照恩同春燠慮一物之偏枯雖
居江海之遙時霑雨露之澤當圖死報難以言宣臣無
任

乞不請支賜添支狀

右臣昨奉勅免持服特授祕書監就差知潭州兼本路
安撫使准中書劄子奉聖旨令韶州特支賜錢三百貫
文尋赴任次在路奉勅改差知桂州廣南西路都鈐轄
兼經略安撫使已於七月十六日到任上訖伏緣臣昨

者起就潭州差遣所以不敢辭免者蓋欲因朝廷之命起湖南兵甲往廣州策應尋奉勅命改差其任益重非臣本志所貪權寵臣今只候楊畋到西路商量邊機了日却乞終喪持服兼臣居喪中已奉聖旨支給前官料錢所有特支賜錢見寄韶州軍資庫并桂州合請添支錢物並乞不請領其原受中書劄子一道謹具封納乞不請中冬翠錦衣襖狀

右臣准桂州牒差人送到勅書一道蒙恩賜臣翠毛細

錦錦旋欄一領者伏念臣自遭荼蓼甫及朞祥屬蠻獠之猖狂廢几筵之號慕未成軍伐屢照天慈且枕塊寢苦禮雖可奪而食稻衣錦心所難安况禦棘之在容顧曳裾而非稱願收渙汗以遂素心已牒桂州更不差人赴京請領所有賜到勅書一道謹具狀封納

回納詔賜冬服狀

臣今月十四日進奏院遞到勅書一道蒙恩賜臣簇四雕兒細錦旋欄等冬服者祇荷寵光不任感懼伏念臣

向遭荼毒歸守丘樊遽屬軍興遂離喪次光陰過隙祥
禪未周墨縗經以臨戎蓋先國事褰衣裳而畫飾難處
人情願回渥恩庶全素志所有前件細錦冬服乞不請
領

謝賜絹狀

右臣今月六日伏蒙聖恩差御藥梁惟一賜臣絹二百
匹令臣迎親歸京者伏念臣本遠人素無通識誤膺擢
用莫補休明昨求外官蓋欲便於溫清過蒙聖造不令

遠去闕庭未知所報之恩更承非望之賜上荷雲天之
施下為鄉里之光誓捐微軀以荅洪覆

謝賜銀狀

右臣今月十三日三班差使殿侍韓喜乘遞馬齎送到
中書劄子并勅誥各一道蒙恩授臣尚書工部侍郎仍
就賜銀二百兩者伏緣殺蕩蠻寇收復邕州並是宣撫
使狄青專總節制及孫沔石全彬等經畫臣雖同在陣
中功非已出併蒙恩寵實不遑安除就賜銀二百兩已

受領外有齎送到勅誥不敢祇受乞行回納已牒送桂
州軍資庫收管聽候朝廷指揮及具狀附遞聞奏去訖
代富樞密辭職表

臣聞君命如天不可違拒臣心所守亦當數陳臣稟性
至愚立朝日淺素無材略上裨聖明去歲契丹恃強侮
慢中國故作瑕隙形於簡書臣蒙誤知專遣報聘奉陛
下之成算尋先朝之舊盟然而歲增貨財以資敵用國
力益屈彼心益驕臣復何顏敘為勞効比者陛下推不

次之寵擢臣樞近臣非不知佐時成務致君之遠圖逃
賞避榮立身之小節其如臣之所守非節而已蓋義有
所處理自未安必若長轡遠馭招懷四夷致其部長稽
首北闕此而為功可也今益以膏血肥其爪牙敵人無
厭出其本性一旦衝突何能保之恃此為功臣所不敢
伏願陛下精擢賢俊百度脩舉臣雖不賞固將安心若
因暫安之勢便謂無窮之福賞雖可冒禍亦何逃臣之
朴誠不欺神理儻或歲月敘遷國朝舊制臣非木石豈

能無心亦非苟徇虛名避此殊寵伏惟陛下察臣誠實
特賜俞允

代狄宣撫賀捷表

臣某言正月十八日至邕州歸仁鋪蠻賊儂智高徒黨
出城迎戰登時殺獲首領黃師必等二千餘人當夜儂
智高焚城將帶殘徒潛遁尋差兵甲及溪峒壯丁襲逐
今月某日已出省地界者萬里奉詞蓋肅將於天討羣
蠻一戰遂收復於邊城中謝竊以國家威疊四方恩涵

八表日月所照悉解辦而來庭舟車所通率輦輦而修

貢蠡爾廣源之部族本惟交趾之附庸自肆陸梁招納
亡叛乘邊陲之失備興戈甲以內侵焚蕩州閭鈔劫生
聚遠浮江鬱直抵番禺自嶺而南忘戰茲久忽逢衝突
無不驚騷亦嘗屢遣師徒分命將帥軍無部伍人不齊
同勇者邀功而鮮謀怯者貪生而先退賊既未經挫衄
愈恣猖狂臣忝預諮詢日親機宥覩茲醜類能不疚心
久煩旰食之憂敢怠請行之志果蒙睿眷見許愚忠授

成算以即途加寵名而異數常慮虛叨邊寄不副主知
况彼竊據城池圖為巢穴守於九地之下未易進攻御
以七擒之奇固無良策而乃敢率犬羊之衆前當貔虎
之師意拒轍而甚驕勢破竹而先解橫尸滿野委甲如
山旣觸網以計窮遂焚營而宵遁係累者逸老幼得以
再生煨燼所餘金帛積而無算再獲金城之固幾還銅
柱之封非臣短材能集茲事此蓋皇帝陛下宸機電發
睿畧天成事達其情體漢光之遠照師行以律賜魏武

之新書故此兇強遽然破碎撫其彫瘵浸惠澤於民心
殲彼狡頑振天聲於方外臣無任

進平蠻記表

臣某言古者興師命將征討四方必有開府之賓參聞
策略所以廟堂成算帷幄密謀擒縱之奇俘馘之實以
撰述備史氏之採撫焉故竇憲燕然之勲陳湯郅支之
捷震疊天聲與大漢傳於無窮者用此術也伏惟皇帝
陛下龍德天飛三十餘載塞外無未清之障域中無不

順之臣以北敵之彊盛而締於歡盟以西夏之陸梁而
終於屈伏夫何小醜敢干天誅彼儂智高者蠢爾溪蠻
生自凶族稔知邊鄙之無備廣招亡叛以協謀直趨番
禺圖據邕管燔毀者十二郡殺掠者數萬人南方繹騷
殆且半歲陛下出於睿算特命樞臣董統虎貔奉辭討
逆金鼓一震羣凶席卷此蓋皇威奮揚軍政整肅人思
用命使之然也殿中丞馮炳奉詔掌管機宜備見師行
始末自智高舉事以致敗亡凡朝廷處置軍前號令及

賊之勝負一能編之詞無虛美事皆實錄以臣共在行
陣遂抄副本見寄臣常忝史官見今之撰日厯者常執
簡於數年之後至乃搜尋檢訪罕能完備今馮炳於已
事之際編輯事實一無遺墜竊以方叔南征列在詩雅
充國西伐敘於史贊非獨顯勲臣之績用于以播國家
之休烈其馮炳撰平蠻記二卷已依本繕寫并臣去年
准宣撫使劄子准樞密院劄子奉聖旨殺到蠻賊尸首
築為京觀仍立石其上鐫記年月及殺獲人數臣尋撰

成京觀記刻石立于邕州歸仁鋪蠻塚之側又於桂州北門之外就崖石磨刻出師平賊受算凱旋年月以宣示皇朝威令用肅遠方今併此碑文別為一卷同馮炳所撰記共成三卷謹隨表進呈伏乞宣付史館

賀生擒儂智高母表

臣某言十月二十四日於大理國特磨道生擒到蠻賊儂智高母僞稱太后阿儂并弟儂智光男儂繼宗儂繼封等尋差管押於今月初五日起離邕州赴闕去訖皇

化遠覃通九譯而無外天誅所及雖萬里而必擒中謝
伏以國家三聖開基千歲接統鬼區請吏海表同文嗟
彼蠢蠻產茲悍婦會于凶族濟以姦謀篡父黨以假權
屠子壻而兼土自開邑部靡識君師習為豺狼遂生蛇
豕去附庸之舊壤并傍近之小區侵軼省封偷延歲律
邊臣罔上不以實聞寇孽野心因之內侮以至燔毀郡
縣係虜吏民東剽番禺北窺桂象屢徼王命圖據邊關
所賴者睿算受成樞臣總律犬羊之衆迎刃而亡禽鳥

之驚棄巢而遁永言夷域絕異華風毒霧鬱而上蒸銳
旅艱於深入假辯士之緩頰誘羣蠻而協心峒民授甲
以赴期寇黨倒戈而自請衆謀亶集元惡就擒猶託井
蛙而自尊豈知天網之難漏本根旣舉枝葉必從眷是
炎荒漸紓邊患此蓋皇帝陛下堯仁天覆漢詔春融恢
皇策而俗旣大同疊天威而遠無不諉故得九夷之外
聞恩信以咸來一惡所歸在逃遁而靡隱罔遺寸鏃遂
獲渠魁再清銅柱之郊庸正藁街之戮亮惟朝著同震

權聲臣伏限守任邊州不獲抃蹈闕庭臣無任

賀誅儂智高母表

臣某言據本州進奏官申蠻賊儂智高等大理國已斬
除訖奉聖旨阿儂腰斬儂智光儂繼宗繼封各處斬訖
者卉服之蠻敢干國紀藁街之戮用正天誅中謝伏以
國家道貫百王德涵萬寓東漸西被邈踰堯禹之封北
洽南翔迥溢漢唐之域蠢茲凶族素隸侯藩嘗竊地以
逃來因拒關而弗納而乃贅居邊境盜弄兵鋒驅掠吏

民燔劫郡縣久安之俗聞寇則驚守長棄城而悉奔士
卒投戈而自潰乘此繹騷之勢肆行僭擬之名母號感
星年稱啟厯蹂踐者十二郡屠害者數萬人還據金湯
圖為窟宅繇是睿謀獨斷樞輔專征廟堂之算有成步
騎之師齊進爪牙雖衆當一戰以皆摧巢穴旣傾棄六
親而莫保寓所生於假父之國投孤族於遠夷之君過
為巧詐之詞自作偷生之計殊不知天下共惡神理弗
容蠻貊雖遥恩信可結元兇支黨先從原野之誅頑媼

孽童卒伏市朝之法國章明備式昭雷電之威天網恢
疎難漏鯨鯢之戮四方共快萬口同詞臣伏恨遠守郡
條不獲蹈舞闕庭臣無任

賀曲赦表

臣某言今月初一日馬遞赦書一道至安撫司以殺獲
蠻寇收復邕州曲赦廣南東西路者登時同官吏集衆
宣示軍民依例施行訖狂蠻竊發遽騷嶺海之邦庶彙
重蘇遠霑雷雨之澤中謝伏以國家接千歲之統擁百

神之休一六合而同風重九譯而脩贄蠢然獠族素附
交城父為戮而不悛母同惡而增酷廣招亡叛庸濟狡
兇窺邊隙以漸深極兵鋒而為暴遠趨南海戈鋌肆掠
於越郊還據兩江文檄徧邀於黃洞妄祈枝附潛覬土
疆赫王怒以遣師輟樞臣而總律顧茲烏合未測天亡
初居井以自深俄當轍而來拒犬羊雖衆聿成膏斧之
誅羽翼先摧遂起焚巢之計既已驅除醜類恢斥邊關
捷布繼聞德音遽霑念深黎庶罹此憫凶特推恢大之

恩仍協發生之候此蓋皇帝陛下乾剛下濟天惠周施
澤兼被於存亡民用忘於疲瘵拯其焚溺匝南夏而永
康育以慈和與萬方而同泰臣無任

賀德音表

臣某言准尚書刑部牒准皇祐六年三月十七日德音
改皇祐六年為至和元年應四京及諸道州府軍監縣
等見禁罪人限德音到日死罪降從流流罪已下並放
當時軍州官吏軍民宣示施行訖先天布令以召四時

之和罪已興言特引萬方之過邦刑是恤聖德惟新中
謝竊以日月之行罔違常數天人之應必感至誠永言
合朔之期或偶二交之次遂成虧薄著驗經躔崇社責
陰春秋之故事避寢修政帝王之舊規恭惟皇帝陛下
道迪大中志深寅畏因三辰之示變詔六職以修方特
推汪濊之恩躬行消復之要渙紀元之大號期敷祐於
羣生更也之明兆民共仰霈然之澤函夏同懽臣伏限
守職邊郡不獲抃蹈闕庭臣無任

賀南郊赦表

臣某言今月十六日馬遞赦書一道至邕州以十一月
四日南郊禮畢大赦天下者當時集本州官吏軍民等
對衆宣示依例施行訖昭事上帝式遵大報之儀敷錫
庶民庸洽來同之福中謝恭惟皇帝陛下接千歲之統
逆三神之釐震威九區化覃萬寓偃閑師節宣暢淳風
年穀屢豐瑞典不絕玉幣涓潔虔事天之誠壇廟肅祇
兼嚮親之孝膺天地之貺故二儀合祭而有嚴承祖宗

之休故三聖偕侑而為始禮交樂具物遂時康均此純
禧霈然諸夏神明來格求福不回瑕穢蕩清與民更始
至於斥去告訐裁減賦租誠誅求之官釋逋負之責斯
皆講盛德之事隆太平之基凡有歡呼萬邦同泰臣伏
限守職邊郡不獲抃蹈闕庭臣無任

賀裕享赦表

臣某言今月十六日准樞密院遞到裕享禮畢大赦一
道當時集官吏軍民宣示施行訖宗祊祀講墮典以

親行雷雨湛恩匝縣區而普及軍民踈踊中外歡呼中
謝伏以國家祚稟赤精運興累聖藝祖題期而立極神
宗奕葉以承休迨文考之握樞至太平而輯化並垂千
古之餘烈此皆百世而不祧恭惟皇帝陛下祗遙先猷
大寧諸夏固嘗備潔牲玉奉見郊丘啟八陛之壇荅二
儀之貺侑三聖于上帝祔羣后於閼宮親籍田之耕配
明堂之享惟茲合食之盛祭久委有司之攝行舉是閼
儀允為大典辨昭穆之序正乎東向之尊均賑膳之禧

表乎祀事之重漢詔寬大齊民樂康減賦罷征乃人心
之至願恤災宥過實王政之所先垂髻盡識於昇平戴
白同懷於悅豫臣無任

謝恤刑表

四序均和聿屆蘊隆之候萬邦在宥爰推欽恤之仁中
謝切念臣本乏吏能謬當州寄屬傷夷之乍起復忠愛
之未孚粵此撫封寧無滯訟涉茲煩漚或窘狴牢上軫
宸聰俯憐遐俗譬諸籠檻開以尉羅特示哀矜之懷庸

頒寬大之詔敢不恪遵漢制祇稟堯言獄未逮於簡孚
情靡忘於伏念庶俾係累之者無嗟暑暵之傷恢布聖
恩遠周邦域

謝賜歷日表

恭以國家政通三統德輯羣元應淳耀以題期罄幅員
而受朔臣濫階儒學猥領郡條因史官推策之勤見聖
人先天之用奉本朝治象之法式謹王正示庶民啟塞
之時裨知帝力臣無任

謝傳宣撫問表

臣某言今月初九日入內內侍省內侍殿頭張昭壽到
昭州蒙恩傳宣撫問者中謝伏以國家恩涵四海威疊
八荒蠢茲徼外之狂蠻素號日南之小族自焚廬帳深
入封疆未即誅夷上煩宵旰臣才非通濟命本羈孤誤
分方面之憂適在傷殘之後道路之勤雖至犬羊之戮
尚稽方懼國章遽傳天語王人之重來自日邊口勅初
聆如親帝所愧乏前茅之慮或深挾纊之恩敢不誨諭

師徒數陳逆順共勵在和之節庶成破賊之功無使腥羶得還巢穴上依睿算期振天聲無任

謝傳宣撫問表

臣某言今月二日入內內侍省內侍殿頭高居簡到州伏蒙聖恩傳宣撫問者人自日邊遠頒於休命語傳天上如對於清光揣己甚微荷恩至厚中謝恭惟皇帝陛下丕承景運祇配嚴裡內盡志於祖宗畢薦誠於嶽瀆臣忝分朝寄適在海邦光華之使斯來郁穆之言遽及

鞠躬聽命初同楚續之溫闔郡改觀共識堯雲之澤但
臣無任

慰溫成皇后張氏薨表

臣某言進奏院正月八日追冊溫成皇后張氏薨謝者
函夏之廣聞問咸驚中謝伏以溫成皇后德稟儒門化
恢嬪則動守珩璜之節退思圖史之規樛木稱賢協隆
陰教藏舟茹嘆遽掩春華恭惟皇帝陛下特軫宸慈俯
追遺懿禮崇三翟增象服以伸懷慘動六宮引鸞輅而

加愴臣無任

武溪集卷十六

欽定四庫全書舊要卷一萬四千二百七十二

集部

武溪集卷十七

宋 余靖 撰

啓

謝帖職啓

右某啓伏奉勅命蒙恩充前件職者天獎曲成寵典過
厚內省鄙薄榮懼交至伏念某本惟庸淺生在遐陬弱
歲就學則經無師範長年力行而才非老成常搆霧而
自知加鑽勵而忘倦且以有道之士樵夫笑其詖諧安

平之時君子耻乎貧賤期慷慨以有立乃徒步而西遊
屬皇德休明崇尚儒術廣求俊秀延及幽陋謹鄉遂之
舉旅登仕途擇羣萃之材首膺嘉命越在官次固亡治
聲徒稽吏資屢進榮秩間者以遷固舊學貫穿博乎羣
書范謝所錄撰述推其良吏向在先代摹於上庠雖千
金置市淮南莫之能改而五經在黌廬生得以裁定咨
於前訓釋以所聞歸赴未央之朝雜上公車之奏敢期
震矚擇用狂言不遺一介之善以廣同文之化石渠平

議摠以鉅儒中秘舊藏採其通說再易歲月僅終緝綴
紕繆畢去固周於叅檢蠹文未辨猶示於傳疑重紆縈
几之觀頗愧雲臺之議宜謂薦言屢上睿澤猥加錄其
微勤升之華貫伏惟昭文僕射相公秉惠和之德輔欽
明之君宣百王未舉之政扶萬世不傾之業裁成庶務
明昭百辟薪樞克充於用白黑不逃其形而况承明之
庭漢儒列於侍從東壁之府唐制專乎刊脩所宜推擇
俊髦收集英乂博求濟理之具以永無窮之聞必若望

實外著器識兼遠屬詞典贍知禮樂而能述立行端方
敦名教而為樂苟中茲選則惟其人夫何鯁生玷是榮
命儻以稽合同異緒正舛忤此而可褒謂之必稱則蔡
邕壁池之本鐫刻以為勞鄭默蘭臺之經嘉歎而尤著
未聞前世推以厚恩揆茲非次之榮迥出常均之外蓋
由熙寧在運明哲主謀譬陽春之和土靡境垆大明之
照物無幽隱用致鑛頑亦被光渥敢不勤服素履祇率
攸聞黃卷之中稍研治體一官之守無隳國經庶答已

知以逃羣謗某無任

謝知英州狀

右某伏奉聖恩授前件差遣者祇荷寵光不任感懼伏
念某才非出類智不適時始懷鋁而備官遽越俎而蒙
罪三遷歲厯再食門征既無狀以昭明固甘心於棄逐
宜謂自天灑澤解網均恩眷言喬木之隣邦付以小侯
之全壤先生里閭便為竹馬之期榮被親闈仍遂蘭陔
之便此蓋某官素垂拔拭力掩瑕疵致此顛愚復沾甄

錄敢不勵精士檢祇率郡條上答天慈旁酬恩造

謝知制誥啓

伏蒙恩制授依前官知制誥知諫院者天獎發中星垣
要切祇膺寵命以榮為憂竊以國家設正諫之官上參
國論開內史之府述宣王言所以祗進英髦克備高闥
乃能規益謀慮申布詞令鼓動萬物渙汗四方故非輕
才所可兼任如某者稟生竒隻賦性蔽蒙乏通識以濟
時無獨行而高俗早違農畔遠託師模才不稱於里閭

譽不宣於庠塾伏自皇明繼照側陋旁求一與計偕即
迂官簿甘心州縣之役絕望英俊之游尋以庚午詔書
恢復科試網羅數路寤寐衆才名在選曹特殊制目天
人三道之要每得敷陳甲乙千題之問僅能酬對進丞
匠署出綰縣章學政未工幸逃官謗嘗刊史簡之誤入
聯書殿之華一忤貴權遽逢譴逐雖聖恩寬惻追還近
甸而私庭奉養乞涖遠蕃初諧守土之榮已報終堂之
痛七更歲律再見闕庭垂紳抱槩克還舊物文昌典詞

之重奉嘗贊禮之勤在於攸司罔敢尸曠屬台臣退老
聖政惟新總攬權綱思廣言路宜期疎闇亦蒙延獎進
無當世骨骭之論下愧芻蕘退闕偏親晨夕之養外慙
烏鳥誠雖許國義切所天累上封章願假麾守宸慈下
照恩賚曲霑俾迎親輿就居京轂徒增忝冒無補休明
未伸執簡之勞遽進代言之秩天居近密法太紫之宗
國命宣行當出納之重寧容底滯玷此選掄此蓋相公
樂育敦懷緝熙成績權衡不撓陶冶無私先為萬乘之

容不棄一才之用謹當砥勵名節祇率忠規貴賤不易
其心險易不更其守勵蹇蹇之節啓寤天聰演深厚之
辭少裨政體過此以往未知所裁

謝知制誥啓

謝外任
并兩制

蒙恩授前件官并差遣者伏念某稟生竒隻賦性蔽蒙
乏通識以濟時無獨行而高俗嘗刊史簡之誤入聯書
殿之華一忤貴權遽逢譴逐七更歲律再見闕庭趨茅
絕之通班帖芸籤之舊職引裾伏諫無蹇正之風簪筆

記言寡良直之譽遽蒙天獎進補掖垣累辭避而莫從
顧忝竊而尤甚此蓋某官因雲洒潤伐木求聲素敦雅
致之誠用集亨嘉之會惟上圖於報效庶無負於朋游
過此以還罔知所措

謝知吉州啓

右某啓伏奉勅命差知吉州軍州事已於八月四日到
州赴上訖伏念某起自寒官本無遠圖偶逢聖明遂玷
清近論人君之得失正史氏之褒貶典西掖之綸綍領

中臺之衡鑑寵任皆過毫髮無裨伏況行人之官列辟
所選銜君命以申信歌皇華而戒途四方式瞻專對為
重且以朝廷之大髦彥比肩至如識周古今言窮治亂
蘊厚重之器抱通博之才可以出鋒穎於囊中暢威聲
於方外者濟濟盈庭不可勝數而猥辱僉議獨當重委
不能死請以堅避讓之誠偶得生還果貽狙習之患原
其所坐當伏嚴刑尚蒙寬恩俾領便郡此蓋伏遇昭文
相公燮調元化開濟萬邦恩九德之咸事慮一物之失

所特形敷奏見軫孤危過彈射溢惡之詞敦國家馭吏
之體正從薄謫庸示深仁風波垂拯於畏塗日月遂回
於曲照再蘇朽瘁敢忘厚恩然念方今甲兵漸息賦歛
必省謹當奉朝廷寬大之詔求古人簡易之理削去苛
橫勤詢疾苦庶竭駑蹇少答恩私往此以還罔知所指

謝充集賢學士啓

伏奉恩守本官充前件職不許辭讓者吏能非稱謬當
方面之權恩典曲施再叅文雅之選祇膺寵渙彌切憂

兢伏念某世系孤平性識疎闇內惟輪翮之無取早嘗
英俊之並游抱槩非工濫巾書府伏蒲何補尸祿諫垣
進掌王言靡成深厚之訓對持史簡曾微良直之才每
慮滿盈果貽謗缺闔門惶懼謝絕親賓築室逍遙自安
藜藿因之就養甘此終身宜期乾坤再造於鴻恩簪履
不遺於舊物起自謫籍付以州麾奄搆私艱復還故里
屬當夷寇倣擾邊陲遽丹詔以臨門俾墨綬而即路單
車獨進初慙應變以非長元帥專征乃幸因人而成事

以至故關脩復首惡遁逃宣大國之威靈結羣蠻之信
誓就擒梟嫗并係孽童雖名捕之尚遺顧烽煙而稍息
願還印綬追襲直麻遽沐渙恩特加近職將軍旗鼓猥
留乘障之居道家蓬萊重踐育才之地深惟任遇敢忘
品題此蓋伏遇某官體國宣慈代天育物功深構厦廣
攬於羣材德茂調元不私於寒谷永言鄙陋無間甄收
謹當董練武經修明政體奉朝廷畫一之令用致民和
宣皇家無外之風永銷邊隙上答雲天之施次酬衡鑑

之恩過此以還罔知所措

謝再任桂州啓

伏奉恩命特授尚書戶部侍郎依前充集賢院學士知桂州候今任成資日仍令再任并准樞密院劄子奉聖旨依前降指揮不許辭讓者伏念某本無遠識早玷通班向緣蠻事之興遽委州麾之重墨綬從政徒廢居喪之儀尺籍理兵素乏臨戎之變賴睿謀之遠照命元帥以專征一戰成功已濫分於賞典三年奉計當例被於

更書忽捧詔音就宣恩旨以謂狂蠻干紀既伏於逋誅
服嶺頌條宜諳於故俗俾留州任庶曉物情再念某頃
被中傷嘗居冗散頗得田園之樂靡思軒冕之榮當警
急之期聞命敢忘於濡足及牧寧之際私心誠願於退
身再露封章上干旒宸未從報罷仍俾拜嘉此蓋伏遇
昭文相公道廣包荒誠深誘善洪鈞造物靡私動植之
恩寒谷迴春曲借發生之氣致茲樗散荐被龍光謹當
詳練武經勵精政體邊亭警備冀銷桴鼓之音條教布

宣庶協蒲蘆之化上答乾坤之造次酬陶鑄之私過此
以還罔知所措

謝知潭州啓

右某啓伏奉勅命就移前件差遣已於今月二十三日
到任上訖伏念某器非應務才乏適時益識淺而慮昏
故毀多而譽少嚮以哀纏風樹歸處丘樊屬當蠻事之
興首預詔除之目三湘假守初令備禦於封陲五莞董
戎遽俾親臨於矢石矧機籌之素情懼首領以難全所

賴者元帥摠其中權邇臣定其遠制乃容無似於此備員以至大憝遐奔子母不能全其族外夷協比斧鉞得以正其誅皆上稟於廟謀致甫消於邊患因之積歲幸免瘝官念婚嫁之失期願珪符而易地果蒙俞旨還撫舊封顧忝竊以居多實權衡之有託此蓋伏遇昭文相公明謨特出廣度并容謂其嘗辱於埏陶未忍遐遺於林藪過形敷奏猶假寵名敢不祇畏簡書詢求疾隱蠻溪戍嶂圖銷未弭之兵士里農閭期間未康之俗庶展

宣風之效庸酬播物之恩

謝知青州啓

右某啓叨奉聖恩就移州任已於今月二十五日到任
上訖伏念某器能闇淺學術空疎早在屏居分絕榮路
旋由喪次起赴邊防微效莫伸優恩屢及瀕湘舊國獄
訟實繁嶺海名邦風俗尤古係當委任皆揔偏方授寄
則深揆才非稱譬諸毛羽居腹背以無堪付以藩宣慙
股肱之為重此益伏遇某官誠敦與善義切包荒不求

備以取人爲之地而延譽密形獎飾致竊寵光敢不祇
率國經詳求民瘼用圖綏緝以報恩私

謝知廣州表

右某啓叨膺睿渥出布藩條祇荷寵光不任感懼已於
今月十八日到任上訖伏念某器非適用智不逮人初
既謝於才升中亦懼於毀廢間蒙驅策頻易炎涼謀無
補於臨戎寵屢叨於進律去歲載馳驛騎重見闕庭猥
當諭旨之行殊乏綏邊之畧暨於復命惟俟黜幽遽陞

網轄之司仍領藩宣之寄下慙猛士徒守於四方仰愧
文昌甫聯於八座此蓋某官義敦與善德極包荒容為
敷揚致茲忝冒敢不體國家忠厚之化究邦俗利害之
源無露才以近名冀順民而成政苟能逃於官謗期勿
負於已知

謝轉工部尚書啓

右某啓叨奉聖恩擢遷官品無從遜避徒積憂兢伏念
某才謝適時器非經遠幸緣孤直誤記清衷擢自書林

超居諫路以至殊鄰專對西掖代言謗篋將盈遺簪罔
棄嘗親臨於矢石幸免喪元曾無紀於旂常徒煩捨爵
屢統綬於武節久陪貳於文昌比者上聖登遐真人應
運堯仁舜孝百世承基乾健離明重熙繼照俊德旁羅
於百辟惠澤廣宣於八紘爰及疎蒙亦叨甄叙此蓋某
官曲加題品俯念哀殘列郡承流已忝股肱之寄六曹
平奏俾陞喉舌之官謹當祇率政經防弭官謗惟圖死
節上報國恩過此以還罔知所措

答淮南轉運段學士啓

右某啓某嚮以瑣材濫躋通籍無沉默之量而克從於
衆慕耿介之節而不得其宜天子以法冠彈非諍臣縫
闕過是疎遠不預謀議況黜陟之際喜怒難回輒陳囊
封果觸天憲投棄南服列為冗官蟾蜍奮臂誠不量力
鷦鷯一枝亦返其分自惟生長草野性仍寡合進無左
右之容退非丘園之秀幸得垂纓抱槩趨走臺閣遠方
之人寧復他望且據權之與失寵孰為輕重當國之與

孤臣孰為勢利苟曰樹黨以營其私則匹夫僮婦猶之
所向區區之誠宜在身計而朝奏暮逐坐為比周痛哀
疾首自明無路冉冉貶所亦既逾年庭闈千里不遑三
釜之樂忠賢盈朝未賜一言之佑然則捨生取義尚欲
為之榮通醜窮固非本志但恐陷此罪罟不為正人所
憐此者伏蒙運使學士敦樹風義遠錫書教靡諂狂狷
猥形賁飾如在寒谷得逢陽春免為妄人自今日始儻
得天下賢士共持此談則雖終身窮賤不自深耻某無

任

回兩浙轉運葉學士啓

右某啓生於遠方不達時務踈網在上自觸機關孤根
立朝飜坐朋黨罹此重辟誰為明之雖蒙聖恩追還近
郡而二親垂白僻在嶠南晨昏既遙甘脆仍闕負罪未
釋靡敢自陳涉江踰嶺因得私覲間關往還七千餘里
近於秋首方抵所局斗筭祿微管庫員冗智力俱困正
在此時常所友厚悉欲委棄同年道卿學士靡汙物態

再貺手幅交情不移於貴賤善導如接於風儀感愧已
還仰覽無數仍聆乞閣史筆歸謁詩庭昔聞三釜之樂
有踰萬鍾之貴自非淡於榮味篤在孝愛者孰能與於
此哉某親哀蒲柳身陷尉羅寸心惶惶瞬息增懼儻逢
渙汗幸脫羈紲當圖南還以潔羞膳久服高義願附子
臧自誓此誠有如白水未由覲覲言不盡意

回狀元宋內翰啓

右某啓某賦性魯拙為學空疎向因舊史之闕文獲承

大匠之諄誨玕珎賤質徒費磨礱瓴甕麤材易成玷闕
身與禍會勢無還期不敢復以封題上污恩舊三年於
茲矣近者湯羅一解漢詔甚寬鄉郡長人容臺進秩皆
出望外釋然南歸天慈甫臨家禍已起循陔之請徒竭
肺肝懷章之行遽變縑經誠願不遂悲酸倍增豈謂狀
元內翰包荒為懷墜甌猶顧遠損緘誨下撫窮愁垂照
至深仰覽無數銜恤之外惟知感恩儻全殘生敢忘厚
德

回賀孫學士啓

伏蒙尊慈以榮陞清貫時惠華牋歡慰之餘但增祇悚
竊以昔漢武用兵四夷朝野多事而嚴助朱買臣之徒
以文學侍左右內與大臣辨論得失外使四方專達詞
令然未有職事之稱唐初開秦府以攬英傑儲將相之
器後闕

回賀彭舍人啓

前闕
某幸以寡聞早陪俊軌濫巾綸閣方懷糠粃之慙

塌翼江風更羨雲霄之舉其於慰抃寧有等夷

回賀吳內翰啓

右某啓伏審光奉聖恩榮陞禁署伏惟歡慰恭惟審官
內翰佐王遠識經國長才器合金王之英詞兼江海之
潤宸庭奏對窮精稔而甚微言路推誠判忠邪而無隱
視進退而惟道履險夷而一心嘗遠握於漢旄誓弗襲
於胡服直聲振於蠻貊高節貫於神明猶以他規亟從
外補士頌中和之職民移愷悌之風毋俟更書遽還綸

閣前席帝所當顧問之益隆持橐禁中增羽儀而為重
官無留事日告遠猷果從玉笋之班進儼金鑾之直職
居要近極為儒者之榮業茂弭綸佇正弼諧之任某猥
叨郡寄久絕英游豈謂謙光特迂誨尺喜忤交集敷叙
奚周

賀梁相公啓

右某啓伏審光膺制命誕告王庭授將鉞之崇資領帥
垣之巨鎮伏惟歡慰恭惟經畧太尉相公識窮治亂業

茂經綸至誠格萬物之和一言備四時之氣陶鈞庶彙
恢陳體國之謨翼亮宸嚴美極濟川之用向從誠請暫
遂均勞隴底綏戎外撫之勲益顯關中阜俗勤歸之望
愈隆將還台鼎之居先正齋壇之拜矧茲全晉控西北
之二陲委以中權靜河汾之萬里併安危之注意彰中
外之一心佇書功於旂常復奮庸於廊廟行躋寵數允
副具瞻

武溪集卷十七